



N^o 03/2475-15

“ 28 ” 10 2015 წ

ააიპ „არასამეწარმეო მედია კავშირ ობიექტის“

გაცნობებთ, რომ 20015 წლის 23 ოქტომბერს, საქართველოს კომუნიკაციების ეროვნულ კომისიას (შემდგომში „კომისია“) მიმართა არასამთავრობო ორგანიზაციათა ჯგუფმა, რომელმაც მოითხოვა რეაგირება მოეხდინა კომისიას თქვენს მიერ სამაუწყებლო ბადეში ყოველდღიურად წამების კადრების ფრაგმენტების გავრცელებისა და გადაცემის, წამყვანის მიერ ერთიანი ნაციონალური მოძრაობის წევრების მიმართ პირდაპირი ფიზიკური ანგარიშსწორების საჯაროდ მოწოდების გამო.

კომისიამ შეისწავლა თქვენს სამაუწყებლო ბადეში 26 და 27 ოქტომბერს გადაცემული პროგრამები და უფლებამოსილია განგიმარტოთ შემდეგი:

1. მაუწყებელთა და არასამთავრობო ორგანიზაციათა აქტიური ჩართულობით, მათი წინადადებების საფუძველზე შემუშავებული და კომისიის დადგენილებით დამტკიცებული მაუწყებელთა ქცევის კოდექსის 38-ე მუხლის პირველი პუნქტის შესაბამისად, „აკრძალულია მაუწყებლის მიერ ისეთი პროგრამის გადაცემა ან პროგრამაში მასალის განთავსება, რომელმაც შეიძლება ზიანი მიაყენოს არასრულწლოვანთა ფიზიკურ, ფსიქოლოგიურ, ინტელექტუალურ და სულიერ განვითარებას“;
2. ამავე კოდექსის 39-ე მუხლის შესაბამისად, „დაუშვებელია სექსუალური სცენის, აგრეთვე გაუპატიურების ან/და სექსუალური ძალადობის სცენის გრაფიკული გამოსახვა და გადაცემა 06.00 საათიდან 24:00 საათამდე; ამასთან, სექსუალური სცენების ან/და სექსობრივი ურთიერთობის შესახებ განხილვების ეთერში გადაცემა 20:00 საათიდან 23:00 საათამდე გამართლებულია მხოლოდ საზოგადოებრივი ინტერესის არსებობისას, ჯეროვნად შემოკლებული და რედაქტირებული ფორმით“;
3. მაუწყებელთა ქცევის კოდექსის 45-ე მუხლის შესაბამისად, დაუშვებელია 18 წლამდე ასაკის არასრულწლოვნებისათვის შეუფერებელი პროგრამების განთავსება 06.00 საათიდან 24.00 საათამდე; 18 წლამდე არასრულწლოვანებისთვის შეუფერებლად ჩაითვლება სამაუწყებლო პროგრამა თუ ის შეიცავს სექსობრივი აქტის ან სექსუალური ძალადობის ამსახველ გრაფიკულ სცენებს; არასრულწლოვანის მონაწილეობით ან გაუკუღმართებული ფორმით სექსუალური ურთიერთობის ამსახველ სცენებს;

ძალადობის ამასხველ სცენებს ახლო ხედით ან 15 წამზე მეტი ხნით (გარდა შემცნებით-საგანმანათლებლო, ისტორიული, ფანტასტიკური ან კომედიური ჟანრის პროგრამებისა);

4. გასათვალისწინებელია, რომ „მაუწყებლობის შესახებ“ საქართველოს კანონის 56-ე მუხლის მე-4 პუნქტის შესაბამისად, იკრძალება პორნოგრაფიის, აგრეთვე ადამიანისა და მოქალაქის ღირსებისა და ძირითად უფლებათა შემლახავი ისეთი პროგრამის ან რეკლამის განთავსება, რომელიც შეიცავს უხამსობას. ამავე კანონის მე-2 მუხლის 3¹² პუნქტის შესაბამისად, უხამსობა ქმედება, რომელიც ეწინააღმდეგება საზოგადოებაში დამკვიდრებულ ეთიკურ ნორმებს და არა აქვს საზოგადოებრივ-პოლიტიკური, კულტურული, საგანმანათლებლო ან მეცნიერული ღირებულება.

5. კომისია შეგახსენებთ, რომ თუ მაუწყებელთა ქვევის კოდექსის შესასრულებლად სავალდებულო ნორმების დარღვევის შემთხვევებს, მაუწყებლის სარედაქციო დამოუკიდებლობისა და სიტყვისა და გამოხატვის თავისუფლების კონსტიტუციით გარანტირებული უფლების დაცვის მიზნებიდან გამომდინარე, მხოლოდ მაუწყებლის თვითრეგულირების ორგანოები განიხილავენ დაინტერესებული პირის მიმართვის შემთხვევაში, „მაუწყებლობის შესახებ“ საქართველოს კანონის 56-ე მუხლის მე-4 პუნქტთან მიმართებაში, ამავე კანონის 59¹ მუხლის კონსტიტუციურობასთან დაკავშირებით, საქართველოს საკონსტიტუციო სასამართლოს შესაბამისი გადაწყვეტილების თანახმად, ადამიანის ღირსებისა და ძირითად უფლებათა შემლახავი უხამსი შინაარსის სცენების სამაუწყებლო პროგრამაში გამოყენების ფაქტი, შეიძლება კომისიის ან/და სასამართლოს მსჯელობის საგანი გახდეს და მაუწყებლის მიმართ ნეგატიური სამართლებრივი აქტის გამოცემა გამოიწვიოს.

6. კომისიამ შეისწავლა თქვენი 2015 წლის 26 ოქტომბრის ეთერი და გამოარკვია, რომ წამებისა და სექსუალური ძალადობის ფაქტების ამასხველი კადრების გამოყენება პროგრამაში განხორციელდა მაუწყებელთა ქვევის კოდექსის მოთხოვნათა დაცვით (მხედველობაში გვაქვს გადაცემის კონტექსტი და სარედაქციო დასაბუთება, ეთერში 24.00 საათიანი წყალგამყოფის შემდგომ განთავსება, უხამსი ელემენტების დაფარვა, მოკლე რამდენიმე წამიანი ქრონომეტრაჟი, რისი გამოყენებაც შეიძლება გამართლდეს გადაცემის კონტექსტით), მაშინ როცა 27 ოქტომბრის ეთერში 20.00 საათიანი წყალგამყოფამდე გასული იგივე კონტექსტისა და შინაარსის პროგრამაში, თქვენს მიერ გამოყენებულ იქნა 15 წამიანი კადრი(სცენა), სადაც ახლო ხედით, დაფარვის გარეშე გრაფიკულად ისახება სექსუალური ძალადობის უხამსი, ადამიანის პატივისა და ღირსების, მისი ძირითადი უფლებების შემლახავი კადრი.

7. კომისიას გათავისებული აქვს მაუწყებლის როლი ინფორმაციის თავისუფლების, მათ შორის მნიშვნელოვანი საზოგადოებრივი და პოლიტიკური მოვლენების შესახებ საზოგადოების ინფორმირების, ზოგადად - სიტყვისა და გამოხატვის თავისუფლების რეალიზაციის პროცესში, თუმცა მიაჩნია, რომ მაუწყებელმა ზემოაღნიშნული კონსტიტუციური ღირებულებები უნდა დაამკვიდროს ისე, რომ არ შელახოს სხვათა, მათ შორის არასრულწლოვან მოქალაქეთა უფლებები.

8. ზემოაღნიშნულის გათვალისწინებით, მოგიწოდებთ თქვენი სარედაქციო დამოუკიდებლობის ფარგლებში დაუყოვნებლივ უზრუნველყოთ თქვენს ეთერში 2015 წლის 27 ოქტომბერს გადაცემული წამების საწინააღმდეგო პროგრამის, ასევე ყველა სხვა მომავალში განსათავსებელი მსგავსი პროგრამების (ასეთის არსებობის შემთხვევაში) ჯეროვანი რედაქტირება და მათი „მაუწყებელთა ქვევის კოდექსის“ მოთხოვნებთან

შესაბამისობაში მოყვანა, ასევე - ამავე კოდექსის შესაბამისად განთავსება სამაუწყებლო ბადეში (წყალგამყოფის დაცვა).

9. კომისიას მიაჩნია, რომ არასამთავრობო ორგანიზაციების ზემოაღნიშნული მომართვის კონტექსტში უნდა განიმარტოს, რომ ჟურნალისტის მიერ პროგრამაში გამოთქმული მოსაზრება ან იდეა, მათ შორის ცალკეული სოციალური (პოლიტიკური) ჯგუფების მიმართ ნეგატიური დამოკიდებულების აგრესიული ფორმით გამოხატვა ჟურნალისტის პროფესიული თავისუფლების, მაუწყებლის სარედაქციო დამოუკიდებლობის ფარგლებშია და დაცულია სიტყვისა და გამოხატვის კონსტიტუციით გარანტირებული თავისუფლებით, თუმცა, ამ შემთხვევაში, ჟურნალისტმაც და მაუწყებელმაც უნდა დაიცვან გამოხატვის სტანდარტი, ვინაიდან, რასობრივი, რელიგიური, ეროვნული, კუთხური, ეთნიკური, სოციალური, პოლიტიკური, ენობრივი ან/და სხვა ნიშნის მქონე პირთა ჯგუფებს შორის განხეთქილების ჩამოსაგდებად ძალადობრივი ქმედებისაკენ ზეპირად, წერილობით ან გამოხატვის სხვა საშუალებით საჯაროდ მოწოდება, თუ ეს ქმნის ძალადობრივი ქმედების განხორციელების აშკარა, პირდაპირ და არსებით საფრთხეს წარმოადგენს საქართველოს სისხლის სამართლის კოდექსის 239¹ მუხლით გათვალისწინებულ ქმედებას.

დანართი: არასამთავრობო ორგანიზაციების მომართვა - 2 ფურცელი.

პატივისცემით,

ვახტანგ აბაშიძე

კომისიის თავმჯდომარე

